



KPT harap Inisiatif PerantiSiswa diperluas kepada 1.6 juta pelajar IPT

Oleh **Ilah Hafiz Aziz dan Ruwaida Md Zain** - September 4, 2022 @ 1:28am
bhnews@bh.com.my



Ismail Sabri bersama Noraini dan Annuar pada Majlis Pelancaran Inisiatif PerantiSiswa Keluarga Malaysia di UiTM, semalam. - NSTP/ASWADI ALIAS

SHAH ALAM: Kementerian Pengajian Tinggi (KPT) berharap Inisiatif PerantiSiswa Keluarga Malaysia dapat diperluaskan kepada 1.6 juta pelajar di lebih 600 institusi pengajian tinggi (IPT) seluruh negara.

Menterinya, Datuk Seri Dr Noraini Ahmad, berkata seramai 523 pelajar menerima bantuan peranti membabitkan tablet berjenama terkenal, pada fasa pertama program berkenaan.

"Saya berharap inisiatif ini dapat disebar lebih meluas lagi, seterusnya memanfaatkan 1.6 juta pelajar di lebih 600 IPT seluruh negara.

"Sebagai rancangan jangka panjang di pihak KPT, aspek keperluan peranti dan akses kepada Internet dijadikan satu daripada fokus dalam pelan pendigitalan pendidikan tinggi negara.

"KPT juga secara konsisten terus memperkuuh agenda pendigitalan pendidikan lebih holistik melalui pemerkasaan infrastruktur, kelengkapan bilik kuliah, pengukuhan kurikulum dan sebagainya, demi mewujudkan ekosistem pendidikan terbaik serta terkehadapan untuk manfaat IPT negara kita," katanya.

Beliau berkata demikian pada Majlis Pelancaran Inisiatif PerantiSiswa Keluarga Malaysia yang disempurnakan oleh Perdana Menteri, Datuk Seri Ismail Sabri Yaakob, di Universiti Teknologi MARA (UiTM), di sini, semalam.

Yang turut hadir, Menteri Komunikasi dan Multimedia, Tan Sri Annuar Musa.

Noraini sekali gus meminta pelajar yang belum memohon Inisiatif PerantiSiswa, supaya mengambil peluang untuk berbuat sedemikian.

"Kita masih membuka permohonan hingga 30 September ini," katanya.